

# Pita'ma Ese Avonkrenea Naneke

---

**1** <sup>1</sup>Nagra Pita'na Jisas Kraisi aposol ne'mo'na, Anumzamo'ma huhampri tamente'nea nagamotma, mopatmi atretma panini hutma Pontusi kazigane, Galesia kazigane, Kapodosia kazigane, Esia kazigane, Bitinia kazigama fretma vu'naza nagamotarega ama avona kreneramue. <sup>2</sup>Anumzana Nafatimo'a, ko antahino keno hu'nea kante, Ruotge Avamumo tamazeri agru hu'nea nagamota, Jisas Kraisi amage'ma antageno, korama'a tagitreno sese huramante'nea nagamotma, asunku'zane rimpa fruzamo'a tamagrane aviteno mesie.

**Mani vava asimuma erisunazanku amuhama hanuna zamofa naneke**

<sup>3</sup>Ranti Jisasi Kraisi Nefa Anumzamofa agi'a erisaga hanune, Agri'a tusi'a asunkuzamo higeta, tagu'a rukrehe hunkeno kasefa tasimura tamigeta, Jisasi'ma friteno oti'nea zankura amuhara nehune. <sup>4</sup>Ana kasefa tasimu erisanti harenunana, vga oreno, havizana osuno, fnanene osaniaza monafinka Anumzamo'a anteramante'ne. <sup>5</sup>Tamagra Anumzamofonte tamentinti hazageno, Anumzamo'a hanave'areti kegva huramante'neankita, so'e hutma manigahaze. Tamagri tamahokeno tamaza hunaku retro huntengeno me'neankino, e'i anazama haniana mona mopa vgamare'nea knazupa eama hugahie. <sup>6</sup>Anazama erisaza zankura muse nehazanagi, ama atupa knafina ruzahu ruzahu knazama e'nerisageno, <sup>7</sup>ana knazamo'a tamentintimofona azeri ama huno, kolima tevefi kre agru huno azeri henteofaza hiankna nehiankino, tamentintimo'a koli'a agaterene. E'ina hu'negu ruzahu ruzahu knazama e'nerisageno, tamentintimo'ma hanavematino mesiana, Jisasi'ma eama hania knazupa, husga huramanteno, ra tamagia tamigahie. <sup>8</sup>Hanki tamagra Agrira onke'nazanagi avesinentetma, menina Agrira onkenazanagi, Agritera tamentinti nehuta, tusi musenkase hunteta agi'a erisaga nehaze. <sup>9</sup>Tamagrama tamentintima hanaza zamofa mizama'a, Anumzamo'a tamagu tamamena tamagu vazigahie.

<sup>10</sup>Hagi ama ana tahokeno taguvazizana, korapara mago'a kasnampa vaha'mo'za asunkuzamo'ma tamagrite'ma esigura kasnampa kea nehu'za,

antahige'za rezagane so'e hu'za ke'naze. <sup>11</sup>Kraisi Avamumo zamagripi mni'nenno, Kraisi'ma atama eriteno, ra agima erisia zankura zmasamine. Ana nehige'za zmagra Kraisi'a inankna Ne'mo, ina zupa efore hugahie hu'za hu'naze. <sup>12</sup>Zamagrite'ma eriamama hiana zmagra'a zamaza nosazanagi, tamagriku knare musenkema huama hazafina, monafinti'ma e'nea Ruotge Avamumofu hanavere huama nehaze. Ankeru vahe'mo'za anama huamama hzazama kesagura, tusiza huno zmavesi'ne.

### Mani ruotge huta manisnunku Anumzamo tagi hu'nea naneke

<sup>13</sup>E'ina hu'negu retro huta antahintahitama nemanita, tamavufgamofu avesizana kegva negritma, ana miko amuha zantamia, Jisasi'ma eama hanigeno, Anumzamo'a tamaza hania asunkuzante anteho. <sup>14</sup>Ke amage'ante mofavremoza nehazaza nehutma, koma ontahinetma hu'naza tamavutamavamofu avesizana ovaririho. <sup>15</sup>Hianagi Ruotge Hu'nemo'ma tamagima hu'nea ne'kna nehuta, makazama hanafina mni ruotge hiho. <sup>16</sup>Na'ankure anage huno avontafepina krentene, ***tamagra ruotge huta maniho, na'ankure Nagra ruotge hu'noe.*** (Lev-Pri 11:44-45) <sup>17</sup>Tamagrama hutma nerafa'e nehaza Anumzamo'a, Agra magokemofonkuke osu Anumzankino, maka vahe'mo'za zamavuzmavama nehazare refkoa huzmantegahie. Ana hu'negu, ama mopafima zoka vahekna huta atupa knafima mni'nenarera, Anumzamofonku kore hunentetma ra agi amiho. <sup>18</sup>Na'ankure tamagrama ketma antahitma hanazana, korapa tamagehe'za zamaza osu zamavuzmava nehaza kante nevazagu, anampinti miza seramantene. Miza seramante'neana haviza nehiazanu, silvane kolireti miza seoramantene. <sup>19</sup>Hianagi haviza osuno afuhe omne sipisipi anenta, Kraisi mrierisa koranu miza seramante'ne. <sup>20</sup>Na'ankure korapa Anumzamo'a, monane mopane tro osu'nenno, tazama hanigura Kraisina huhamprinte'ne. Hianagi menina vgare knafina tamagri'ma tamaza hanigu efore hu'ne. <sup>21</sup>Kraisi taza hige'ta, fripinti azeri otino husga hunte'nea Anumzamofontera tamentintia nehune. E'ina hu'negu tamagra Anumzamofontera tamentinti'a nehutma, amuhara nehaze.

<sup>22</sup>Tamagrama tamage kerema amagama antetma nevazazamo, tamazeri agru tamagu tamena hige'ta, neramafuma ovesinte avesinte tamagu'areti nehutma, tamaguareti hutma mago magomota ovesinte avesintea nehaze. <sup>23</sup>Na'ankure tamagra kasefama hu'nazana, haviza nehia avimazanteti rompage, haviza osu avimzama Anumzamofu mevava kea asimu me'nea ke'areti kasefara hu'naze. (Jon 3:1-9) <sup>24</sup>E'ina hu'negu avontafepina anage hu'ne, ***maka vahe'mo'za trazankna hunazankino, maka konariri zmimo'a trazamofu amosregna higeno, ana trazamo hagege higeno, amosre'amo evuramiankna hugahaze.***

<sup>25</sup>***Hianagi Anumzamofu nanekemo'a mevava hugahiankiza,*** ama'i ana naneke huama hu'za tamasami'naze. (Ais 40:6-8)

### Kasefa mofavregna huta mani'nuna naneke

**2** <sup>1</sup>E'ina hu'negu tamagra vahe'ma azeri havizahu avu'avazane, havige hu'zane, tavrenke hu'zane, kenunu hu avu'avazane, vahe'mofo amefi ke hu'zana netretma, <sup>2</sup>meni kasentea mofavremo aminku avesiankna hutma Anumzamofu kegura avenesita, Anumzamofu agru hu'nea nanekea e'neritma nena hugahaze. Ana nehanageno tamagu vazinoma, tamahohe ahe'nea zampina nena hugahaze. <sup>3</sup>Hanki e'inama hutma Anumzamo'ma so'ema huneramantea zamofu haga'ama erisuta, Ramo'a so'e hune hutma hugahaze.

### Jisasi'a asimu eri have mani'nea naneke

<sup>4</sup>Kraisi'a asimu eri have mni'nemofonte tamagra Agrite neaze. Ana havea vahe'mo'za haviza hu'ne hu'za eri atrenazanagi, Anumzamo'a huhamprintegeno, Agri avurera mrerisa have me'ne. <sup>5</sup>Tamagranena asimu eri havegna hu'nazageno, avamupi mono nona kiaza nehigetma, avamupi ruotge prisi vahe'mofo nonkna nehutma, Anumzamo avesi'nea ofa Jisasimpi avamupina hunentaze. <sup>6</sup>Na'ankure anage huno avontafepina me'ne, ***Keho Zaioni agonarera mrerisa have huhamprintoankino, nomofu renagentete azeri hanaveti have me'ne. Hanki iza'o Agrite'ma amentinti hanimo'a, agaze osugahie hu'ne.*** (Ais 28:16)

<sup>7</sup>Hanki tamagrama tamentintima haza vahe'motarera, ana havemo'a mrerisa have me'ne. Hianagi iza'zo zamentintima nosaza vahetera, ***Nogi vahe'mo'za zmvaresara higeza atraza havemo'a, nomofu renagentepinka azeri hanaveti have fore nehuno,*** (Sam-Zga 118:22) <sup>8</sup>***zmagigo zamino zmazeri tanafa nehuno, zmazeri traka hu have fore hu'ne.*** (Ais 8:14) Na'ankure zamagra trakama nehazana, ke'arera amagera nontazanki'za, traka hu'za haviza hugahaze.

<sup>9</sup>Hianagi Anumzamo tamagrira huhampriramante'nea naga mni'neta, kinimofu prisi naga mni'neta, ruotge hu'nea naga mni'nazageno, Anumzamo'ma Nagri nagare huno hu'nea naga maninazankita, Anumzamo'ma hanimpintima tamagima huno, ruzahu msazama'arema tamante'nea so'ezama'agura huama hugahaze. <sup>10</sup>Hianagi kora tamagra Anumzamofu vahera omni'nazanagi, menina Anumzamofu vahe mani'naze. Tamagra Anumzamofu asunkuzana e'orinazanagi, menina tamagra Anumzamofu asunkuzana eri'naze.

<sup>11</sup>Navesima neramantoa nenafugta, tamagra zoka vahe mopazmi omne vahekna hutma ama mopafina mni'naze. E'ina hu'negu, tamavufamofu havi avesizamo'ma ha'ma reneramantea zampina uofreho hu'na nagra huneramasamue. <sup>12</sup>Hagi maka kna tamagra megia vahe'mokizmi amunompima mani'netma, knare tamavutmava nehinke'za, zamagrama huhavizama huramantesu'za, knare tamavutamavaza zamagra nege'za,

Anumzamoma refkoma hania knarera, ana tamavutamava hu'naza zankura, Agi erisaga hugahaze.

<sup>13</sup>Tamagra Ramfonku hutma, maka kamani vahe'mofo kea amage nentetma, kini vahera ugagota hu'nagu, kezmia antahitma amage nentetma, <sup>14</sup>Gavana vahe'mo'zanema hanaza kea amage anteho. Hazenke hanaza vahe zmazeri fatgo nehuno, fatgoza hanaza vahe husga huzmantesagu huzmanteg'e'za mni'naze. <sup>15</sup>Na'ankure e'inhau tamavutmavama hanazana Anumzamomo avesiza avaririta fatgo nehanageno, ke ontahi neginagi zmavuzmavama nehaza vahe'mo'za kea osugahaze. <sup>16</sup>Kina vahera omi'nazanki, fru huta mni'nagu, fru huta mni'none nehutma, ana fru tamavutamava zampina antegafita, kefo avu'avazana osutma, Anumzamomo kazokzo eriza vahe maniho. <sup>17</sup>Maka vaheku husga hunezmantetma, maka zamentintima nehaza tamafuhe'ina zmavesinezmantetma, Anumzamofonku kore hunentetma, kini vahe'mokizmi zmagorga maniho.

<sup>18</sup>Eri'za vahe'motma, kegvama huramante'nesaza vahe'mokizmia kore huzmantetma zamagorga nemanitma, fru hu'za knarema huramante'naza kva vahe'mokizmi zamagorgagera omanita, havizama huramantesaza kva vahe'mokiminena zmagorga maniho. <sup>19</sup>Tamagrama Anumzamofontema fatgo tamagu tamagesa antahitma mni'nenageno, havigema huramante'za tamazeri havizama hanazana, Anumzamomo asomu huramantegahie. <sup>20</sup>Tamagrama haviza hu'nenage'za, havizamomo nona hu'za tamazeri haviza hanazana, mago knare'zana e'origahaze. Hianagi tamagrama knare tamavutmazama nehanage'za, tamazeri havizama hanazana, Anumzamoma asomu huramantegahie.

### Kraisi avu'avaza negeta avaririsunazamomo naneke

<sup>21</sup>Na'ankure tamagrira ana knaza erisazegu tamagi hu'ne. Kraisi enena anahukna huno atazana erino huraveri hu'neankita, Agrama hu'neankna tavutava huta avaririgahune. <sup>22</sup>***Agra kumira osuno, mago havigea agipintira osu'ne.*** (Ais 53:9) <sup>23</sup>Hanki Agri'ma huhavizama huntageno'a, zamagrira nona huno huhavizana huozmante'ne, Agri'ma azeri havizama huntageno'a, zamagrira nona huozmanteno zmazeri havizahu kea osuno, Anumzamomo fatgo huno refko nehimofo antahi nemino, ana knazana Agri azampi antene. <sup>24</sup>Agra avufare kumiti erino rugeka zafare hantinegu, tagra kumi'ma huzampina nefrita, fatgo tavutavama huzampina, kasefa huta manigahune. Na'ankure Agri avufgama aguzama ru'nazazamo, tagrira tazeri so'e hu'ne. <sup>25</sup>Na'ankure tamagra sipisipi afukna hutma hazagre'nazanagi, menina tamagra rukrehe hutma sipisipi kva ne, tamagu tamemomo kva Nete e'naze.

### Aravemomo naneke

**3** <sup>1</sup>Anahukna kante, a'nemotma neramave agorga nemaninke'za, mago'a Anumzamomo kema amagama nontesaza neramave'za

nege'za, mago kea osugahazanagi, knare tamavutamavaza nege'za zamagu'a rukrahe hugahaze. <sup>2</sup>Na'ankure tamagra anemotma fatgo hutma vetimimifo agorga'a mni'nazagu anara hugahaze. <sup>3</sup>Tamagrama a'nemotma tamazokama ki hariritma kolire tamavasese nehutma, kukena nehutma, amega tamavufgare konariri huzankukera osiho. <sup>4</sup>Hianagi tamagu'afi havizama osania avasesezana, fru huno akoheno mani avasese'za hiho. E'inahu avasese zanku Anumzamofona avenesie. <sup>5</sup>Na'ankure korapa knafi ruotge hu'za mni'naza a'nemo'za, e'inahukna hu'za zmavasesea hu'ne'za, Anumzamo'ma huvempama huzmante'nea zama fore'ma hanigu Anumzamofonte amuha nehu'za, ve'zamimifo agorga mni'naze. <sup>6</sup>Anahukna huno Sera'a Abrahamu amage nenteno, ranimo'e huno Abrahamunkura hu'ne, tamagra neramavenku'ma kore'ma osu knare zanke'ma hanutma, Sera mofane manigahaze.

<sup>7</sup>Hanki vene'nemota knare antahintahi avariritma, a'ne tamimozanena so'e hutma maniho. A'nemo'za hanave oti'nagu, knare tamavutmava huzmanteho. Tamagrama antahi'nazana a'nemo'za zamagranena zmasimu erigahaze. E'inahu hutma avaririsageno'a, magozamo'a nunamuma hanaza nunamuntamia rehizara osutfa hugahie.

**Haviza hurantesaza vahemokizmi knare  
tavutava huzmantesuna naneke**

<sup>8</sup>Hagi makamotma magopi fru hutma nemanitma, vahe'mokizmia tamasunku hunezmantetma, kogna hutma nemanitma, tamagu'areti so'e tamavutma nehutma, tamagu'a anteramita maniho. <sup>9</sup>Vahe'mo'za havizama huramantesagetma, nona hutma haviza huozamanteho. Kema huhavizama huramantesageta, nona hutma kea huhavizana huozmanteta, tamagra Anumzamofa antahigenkeno asomu huzmanteno, Anumzamo'ma tamagima hu'neana, e'inahu hnazegu tamagi hu'neankitma, asomura tamagra erisanti haregahaze. <sup>10</sup>*Iza'o knare hu'na manisue huno agesa nentahino, knare knama kesiazanku'ma avesintesimo'a, kefo kema huzankura agefuna kegva nehuno, agipintima havige huzankura kva hino.* <sup>11</sup>*Kefo avu'avazampintira atreno, knare avu'avaza nehuno, rimpa fruma huno mni'zanku hakeno avaririno.* <sup>12</sup>*Na'ankure fatgo vahe'mokizmia Anumzamo'a avua anteno kegva hunezmanteno, nunamuzmia antahi nezamie. Hianagi havi zamavu'zmavama nehaza vahe'mokizmia, Anumzamo'a zmefi huzamino ha'renezmante.* (Sam-Zga 34:12-16)

**Knare tavutavama hanunazante tata erisuna naneke**

<sup>13</sup>Tamagrama hanavetitma so'e tamavutamava nehnageno'a, iza tamazeri havizana hugahie? <sup>14</sup>Hianagi tamagrama fatgo tamavutamava'ma nehanage'za, tamazeri haviza hugahazanagi tamagra

asomu erigahazanki, korera osuta tamazeri kore hanaza zankura antahintahi hakare osiho <sup>15</sup>Hianagi tamagu'afina Kraisina atrenkeno ruotge huno Rana nemanina, tamagrama fore'ma hanigu amuhama nehutma tamentintima nehaza zanku'ma tamantahima kesageta, maka knafina tro hutma mni'netma, antahinezamita akohetma fru kefinti kenona hunezmanteta, <sup>16</sup>tamagu'tamagesafina ama' huta fatgo hutma maniho. E'inahu'ma hanutma, Kraisi'enema knare'ma hutma mni'naza zanku'ma havigema humaneramantesia vahe'mo'za zmagazegu hugahaze. <sup>17</sup>Na'ankure Anumzamofa avesi'ma me'nenigeta tagrama knare tavutavama nehanunke'zama, tazeri havizama hanazana, knare hugahie. Hianagi tagrama havi tavutavama hanunte'ma, knama tamisazana havizantfa hugahie.

<sup>18</sup>Na'ankure Kraisi'a maka vahe'mofa kumiku huno, magoke zupa fatgo ne'mo, fatgo osu vahe'motagu fri'neankino, Agra tavareno Anumzamofante vanigu ahazageno fritegeno, Anumzamofa Avamu'mo azeri otigeno, kasefa huno mani'ne. <sup>19</sup>Agra vuno kina kumapima mni'naza avamutaminte kea ome huama hu'ne. <sup>20</sup>E'i ana avamutamina korapama Noama ventema negigeno, Anumzamofa ke eri atrazanagi, Anumzamofa akoheno zmavega anteno mni'nea avamutamine. Hankino <sup>21</sup>8ti'a nagamoke'za ana timo'ma zmahe refitegeno'a, zamaguravazine. (Jen-Agf 6-8) <sup>21</sup>E'i ana timo'a mono tima frezamofa avame zankino, Jisasi Kraisi'ma friteno oti'neazamofa hanavemo tamagura vazi'ne. Hankino mono tima frezamo'a pehena erinotreanki, agru tagutagesareti Anumzamofoma antahimisunazane. <sup>22</sup>Hagi Jisasi'ma monafinka vuno Anumzamofa azantmaga umani'nege'za, maka ankeri vahe'mo'zane, kegva hu'nazamozane, hanavemo'za, Agri agorga'a mani'naze.

#### Kazigazi huta ovesinte avesinte hanuna naneke

**4** <sup>1</sup>E'ina hu'negu Kraisi'ma avufafima atazama eri'neankna nehutma, tamagra anahukna antahintahi erita maniho, na'ankure tamagrama anahu knazama erinutma kumi'ma huzana atregahaze. <sup>2</sup>Anahukna huno ama avufanganema mni'nenuno'a, vahe'mofa havi avesizampina ovugahianki, Anumzamofa avesizampi vugahie. <sup>3</sup>Tamagra Anumzamofoma keno antahino osu vahekna hutma, zaza kna ama mopafina mni'neta, havi tamagu tamagesa nentahitma, havizamofa avesizampi nemanitma, negi tina nenetma, ranke huta vano nehuta, neza kretma nenetma, havi anumzamofa mono hunte'naze. <sup>4</sup>Menina korapa arone timimo'za havi tamavutamavara nosazage'za neramage'za, nahige'za tagranena vano nosaze hu'za antri nehu'za, tmazeri haviza huke nehaze. <sup>5</sup>Hianagi zamagra keagama refkoma hu Jasi nemofonte oti'za, nankna z mavu'zmava hu'nenazana nesamisage'za, fri vahe ene kasefa hu'za mni'naza vahe'enena refko huno keaga huzmantegahie.

<sup>6</sup>E'i ana agafare knare musenkea fri'naza vahete'enena huama hazage'za antahi'naze. Nazano ama zamufare mni'ne'za hu'nesaza zante refko huzmantegahie. Hianagi avamu'zmimo'a, Anumzamofa avesite manigahie.

<sup>7</sup>Makazama vgaesia knamo'a, hago kofta hie, e'ina hu'negu antahintahia hu so'e nehutma, nunamuma hu tamavutamavamofo azeri hanavenetita, kazigazi hutma viho. <sup>8</sup>Makazama agatere'neazama hanazana, vaheku'ma ovesinte avesinte hu avu'avazana otretfa hiho, na'ankure avesinte avu'avazamo'a, rama'a kumi refinete. <sup>9</sup>Mono tamafu tamagnazama esageta, so'e tamavutamavaza hunezmantetma, antahi havizana hutma ke hakarea huozmanteho. <sup>10</sup>Magoke magokemotma Anumzamo'a so'e musezama'a taminegu, ana musezanteti rumokizmia so'e tamavutamavaza hunezmantenkeno Anumzamofa so'e avu'avazamo'a, tamagripina aviteno vino. <sup>11</sup>Magomo'ma Anumzamofa nanekema huamahu musezama eri'nenimo'a, huama nehina, mago'mo'ma vahe'ma azahu musezama eri'nenimo'a, Anumzamo'ma ami'nea hanavereti vahera aza nehinketa, makazama hanazana Anumzamofoma ra agima amizanke hiho. Na'ankure Jisas Kraisi'a masnentake huno hanave'ane mni'ne. Tamage.

### Jisasi'ma hu'neankna huta tataza erisanuna naneke

<sup>12</sup>Ronenimota tamagra reramahe zampima nevazazamo'a, tevefi viaza nehazagu kasefaza fore nehie hutma antria osiho. <sup>13</sup>Hianangi ana tamatazama e'neriza zankura muse huvava hiho. E'i anazamo'a Kraisi'ma atama eri'neaza nehazankino, Agrama hanavenentake masa'ane eama hanigetma, magokama muse hanaza zamofa retro huneramante. <sup>14</sup>Hanki Kraisi agi tamagripa me'nenige'za, tamazeri haviza hanazana, asomu erigahazanki muse hiho. Na'ankure hanavenentake msa'ane Avamu'ene Anumzamo'enena tamagrane mani'ne. <sup>15</sup>Tamagra vahe ahefrizantero, kumazafa sezantero, mago'a hazenkerero, vahe'mokizmi zante tamagena vazigevazige nehutma, tamata erizanku kegva hiho. <sup>16</sup>Hianagi iza'o mono vahe'ma mni'nenigeno, atama amisaza zankura agazegura osino. Hianagi e'i ana mono agima eri'neazankura, Anumzamofa agi erisaga hino. <sup>17</sup>Na'ankure Anumzamo'ma vahe'ma refko hania kna hago neankino, esera Anumzamo'a Agri'a nagamota refko hugahie. Hanki tagritema agafama huno refkoma hanuno'a, knare musenkerema zamentintima nosaza vahetera, inankna hugahie. <sup>18</sup>Anumzamofa avontafemo'a anage hu'ne, ***fatgo vahe zmaguma'vazizamo'ma amuhoma hanigeno'a, Anumzamofoma atrezama kumima nehaza vahetera, inanknaza fore hugahie?*** (Pro-Knr 11:31)

<sup>19</sup>E'ina hu'negu tamagrama Anumzamofa avesizama amage'ma nentenageno, vahe'mo'za tamatazama tamisageta, tamagri'ma tro'ma

hurmente'nemofonte tamentintia nehutma, fatgo tamavutamava huta maniho.

### Mono kva vahe'ene kasefa vahe zmavumro naneke

**5** <sup>1</sup>E'ina hu'negu mono kva vahe'motma, nagranena tamagrikna huna mono kva ne' mni'nena, Kraisi'a atazana erigena, ke'nomonane, tamagrane magoka Kraisi hanavemo eama hanigeta erisumona neramasamue. <sup>2</sup>Sipisipi kva vahemota, Anumzamofu sipisipi kevu nagama kegvama hanazana, vahe'mo higure huta osutma tamaguareti Anumzamofu avesi'mo'ma hu'nea kante kazigazi hutma kegva nehutma, havige hutma zgoma tro hukazigatira anara osiho. <sup>3</sup>Tamagri kvafima mni'naza vahetera, ra vahe mni'nonankita kegva huzmantegahune hutma ana vahekura osiho. Hianagi knare tamavutmavaza huzmaveri nehinke'za nege'za, tamavaririhio. <sup>4</sup>Hagi Kraisi'ma ugota Sipisipi kva ne'ma efore'ma hania zupa, hanave'amo'a vgaore kini fetori eme tamigahie.

<sup>5</sup>Kahefa vahe'mota, anahukna hutma ugagota huramantenesaza ra vahe'mokizmi naneke antahizmita zamage anteho. Makamotma anterami tamavutamavara kukena hiaza nehutma, rumokizmi zmagorga umani emani hiho. Tamage huno avontafemo'a anage hu'ne, ***zmagra zmavufgama erisaga haza vahera Anumzamo'a ha'renezamanteno, zmavufgama anteramiza mni'naza vahera knare hunezmante.*** (Pro-Knr 3:34)

<sup>6</sup>E'ina hu'negu tamagra Anumzamofu hanavenentake azampi anteramita mni'nenkeno, kna fatgore tamazeri antesga hino. <sup>7</sup>Hakare'a knazantmia Agrite atreho, na'ankure Agra tamagrira kva huneramante. <sup>8</sup>Tamagra negia onetma, kva hutma maniho. Ha' vahe'timimo Sata'a agra laionigna huno akoheno rerakaureno krafa huno vano nehuno, ahenoma nesia vaheku nehake.

<sup>9</sup>Hu'neanagi, tamentinti azeri hankavetineta, Satana retufe atreho. Antahi'naze, Anumzamofu amage nentaza vahe'ma, mika kaziga tmafuhe'zane tmasaro'zane magozahu knazane, zamata zana e'nerize. <sup>10</sup>Hanki atupa'a knafi tamatazana erigahazanagi, tamagri'ma Kraisi manivava msa'afima tamagima hu'nea Anumzamo'ma tamazeri knaretfu nehuno, knare hu'naze huno huneramanteno, tamazeri hanavetina, oti hanavetita manigahaze. <sup>11</sup>Maka hanavea Agrite me'nenno, mevava hugahie. Tamage.

### Atupa naneke

<sup>12</sup>Hanki Sailasi'a nazahigeta ama atupa avona kre'no'e, nagrama kena antahinama agri'ma huana, fatgo huno Ramofona amage nentea nenafu mni'ne. Nagra ama atupa avoma kreneramuana, tamazeri hanaveti



ke hu'na, Anumzamofu tamage asunku zankura kreneramuanki, ana asunkuzantera oti hanavetiho. <sup>13</sup>Anumzamo'ma huhampri zamantege'za, Babilonima mni'naza naga'mo'za, musenke atreramantaze. Maki'a nagri mofavreni'agna hu'nemo'a, musenkea atreramante. <sup>14</sup>Magoke magokemotma fatgo huno ruotge hu'nea avu'ava hutma, agi hene agona ahene hutma maniho. Kraisimpima mni'naza nagamotma, rimpa fruzamo'a tamagrane mesie.